



孝經大義

1011

服部文庫  
117  
2/2





孝經大義序

孔門之學惟曾子得其宗曾氏之書有二  
 曰大學曰孝經經傳章句頗亦相似學以  
 大學為本行以孝經為先自天子至庶人  
 一也堯典一篇大學孝經之祖也自克明  
 峻德以至親睦九族極而百姓之昭明萬  
 邦之於變大學之序也孝之為道蓋已具  
 於親睦九族之中矣何也一本故也自是



舜以克孝而徽五典禹以致孝而叙彝倫  
伊尹述成湯之德一則曰立愛惟親二則  
曰奉先思孝人紀之修孰大乎是文武周  
公帥是而行備見於記禮所載上而宗廟  
之享下而子孫之保其爲孝茂有加焉功  
化之盛至使四海之內人人親其親長其  
長一鱗毛一茅甲之微無不得所嗚呼二  
帝二王之教可謂大矣孝經一書卽其遺

法也世人春秋皇綱紐解孔子傷之三覆  
昔者明王孝治之言思之深望之切矣誠  
使天子公卿躬行其上凡禮樂刑政之具  
壹是以孝爲本則斯道也固天性之自然  
人心之固有一轉移間王道顧不易易乎  
惜也徒託之空言而僅見於門人記錄之  
書也書存而道可舉雖不能行之一時猶  
可詔之來世今此經之可考者不過漢藝



文志而已而其篇次則顏注古文二十一章孔壁所藏本也今文一十八章河間王所得顏芝本而劉向之所參校者也要之出於諸儒傳會皆非曾氏門人所記舊文矣唐玄宗開元敕議意非不美而司馬貞淺學陋識并以閨門一章去之卒啓玄宗無禮無度之禍而其所製序文至以禮爲外飾之所資仁義爲後來之漸有不知所

謂因心之孝者果何所因而又何自而萌乎學之不講德之不脩一至於此桓桓文公特起南夏平生精力用工易四書爲多至此書則僅成刊誤一編註釋大義猶有所未及噫人子不可斯須忘孝則此經爲天子至庶人一日不可無之書章句已明而文義猶闕顧非一大欠事乎蓋嘗有志彙集諸家傳註以明一經而未果一冊余



友胡庭芳挈其高弟董真卿訪余雲谷山  
中手携孝經大義一書取而閱之則其家  
君深山先生董君季亨之所輯也其書爲  
初學設故其詞皆明白而切實熟玩之則  
義趣精深又有非淺見謏聞所能窺者族  
兄明仲敬爲刊之書塾以廣其傳此豈惟  
學者脩身齊家之要而有國有天下者亦  
豈能外是而他有化民成俗之道哉噫滕

五十里國耳其君一用之至於四方草偃  
風動一時行事猶班班有三代之風學問  
之功用固如此晉武魏文亦天資之美者  
惜諸臣無識不能以啓道而充大之悠  
悠蓋壞此經之廢蓋千五百餘年人心兼  
彝極天罔墜豈無有能講而行之者誠有  
以二帝三王之心爲心則必以二帝三王  
之教爲教矣仁人心也學所以求仁而孝



孝經九章  
則行仁之本也語曰如有王者必世而後  
仁愚何幸身親見之歲在乙巳陽復之月  
前進士武夷熊禾序嘗大德之九年也

朱文公作孝經刊誤以古文定為經一章傳十  
四章合千七百八十字內刪去二百二十三字  
經一章  
今文開宗明義章第二至庶人  
章第六合為一章

傳之首章  
今文廣至德章第十三  
傳之二章  
今文廣要道章第十二  
傳之三章  
今文三才章第七  
傳之四章  
今文孝治章第八  
傳之五章  
今文聖治章第九上一節



傳之六章 聖治章下一節  
 傳之七章 今文紀孝行章第十  
 傳之八章 今文五刑章第十一  
 傳之九章 今文事君章第十七  
 傳之十章 今文感應章第十六  
 傳之十一章 今文廣揚名章第十四  
 傳之十二章 古文閨門章第一  
 傳之十三章 今文諫爭章第十五  
 傳之十四章 今文喪親章第十八

孝經大義



朱文公刊誤  
 鄱陽董鼎註

善事父母為孝人之行莫大於孝堯舜本  
 公傳之孔子壹以此道此書乃曾子聞於  
 孔子而曾子門人又以此所聞於曾子者合  
 而記之以為一經上自天子下至庶人皆  
 當受用近之閨門妻子兄弟弟長幼遠之天  
 地鬼神四海百姓皆自此推之經常也名  
 之曰孝經者以其可謂天下萬世常法也

仲尼閒居曾子侍坐子曰參先王有至德要  
 道以順天下民用和睦上下無怨汝知之乎

閒音閑間字坐  
 字參字今文無

仲尼孔子字名丘曾子孔子弟子名參字



子與稱子者尊之也此書曾子門人所記也孔子稱字曾子稱名師弟子之義也閑居燕居之時也仲尼呼曾子之名而語之以古先聖王之所以治天下自有極至之德切要之道以順其心故天下之民以此和協而親睦上下舉無所怨汝其知之否乎蓋天下之怨每生於不和不和之患常起於不順今有一箇道理能使之和順而無怨誠學者所當知也引而不發重其事

而未欲遽言之也德者人心所得於天<sup>天</sup>之理仁義禮智信是也此五者皆謂之德而此獨舉其德之至道者事物當然之理皆是而其大目則父子也君臣也夫婦也昆弟也朋友之交也此五者即仁義禮智之性率而行之以為天下之達道者也皆謂之道而此獨舉其道之要道也德也一理也見於通行者謂之道本於自得者謂之德德之至即所以為道之要順者不過因



人心天理所固有而非有就強拂為之也  
曾子辟席曰參不敏何足以知之避辟音  
禮師有問辟席起對曾子見孔子舉其德  
而曰至德舉其道而曰要道其事重大故  
辟席而起辭讓而對

子曰夫孝德之本也教之所由生夫音扶生  
下今文有

至此方字也言出於孝字即所謂至德要道也  
仁義禮智雖皆謂之德而仁為本心之全

德仁主於愛愛莫大於愛親故孝為德之  
至父子君臣夫婦兄弟朋友之交五者雖  
皆謂之道而親生膝下行之最先故子孝  
於父獨為道之要本猶根也行仁必自孝  
始君子親親而仁民仁民而愛物一念之  
發生生不窮猶木之有根也聖人以五常  
之道立教本立則道生移之以事君則忠  
矣資之以事長則順矣施之於閭門則夫  
婦和矣行之於鄉黨則朋友信矣充拓得



去舉天下之大無一物而不<sub>レ</sub>在吾仁之中  
無一事而不自吾孝中出故曰教之所由  
生

復坐吾語汝身體髮膚受之父母不敢毀傷  
孝之始也立身行道揚名於後世以顯父母  
孝之終也夫孝始於事親中於事君終於立

身夫音扶

孝之義甚大而其爲說甚長非立談可盡  
故使復位而坐而詳以告之孝以守身爲

大身者親之枝也舉其大而言之則一身  
四體舉其細而言之則毛髮肌膚此皆受  
之於父母者父母全而生之我當全而歸  
之爲人子者愛重其身而不敢少有毀傷  
此乃孝之始事也至於能立其身能行其  
道不惟自揚其名而又以顯其父母此則  
孝之終事也故夫所謂孝者始於事親爲  
孝子中於事君爲忠臣忠孝兩盡則終於  
立身爲全人矣蓋孝者五常之本百行之



源也未有孝而不仁者也未有孝而不義者也未有孝而無禮無智無信者也以之事君則忠以之事兄則悌以之治民則愛以之撫幼則慈一孝立而萬善從之始言保身之道終言立身之道蓋不敢毀傷者但是不虧其體而已必不虧其行而後方可言立身故以是終之

愛親者不敢惡於人敬親者不敢慢於人愛敬盡於事親而德教加於百姓刑于四海蓋

天子之孝

惡去聲

親謂父母也愛者仁之端敬者禮之端惡者愛之反慢者敬之反德教謂至德之教刑儀刑也孔子既言孝者德之本教之所由生於是首言天子之孝天子者又德教之所自出也為天子而愛其親者必於人無不愛而不敢有所惡於人敬其親者必於人無不敬而不敢有所慢於人我之愛既盡則人亦興於仁而知所愛矣我之敬



既盡則人亦興於禮而知所敬矣夫如是則四海之大百姓之衆皆知有所視效而同歸於孝矣此蓋天子之孝當如是也天子者天下之表也上行之則下效之君好之則民從之天子所以愛敬其親者如此其至則下之人所以愛敬其親者亦莫敢不至况孩提之童無不知愛其親及其長也無不知敬其兄愛親敬兄本人心天理之固有天子亦順其所固有而利導之耳

安有感之而不應倡之而不和者哉所謂先王有至德要道民用和睦上下無怨者如此

在上不驕高而不危制節謹度滿而不溢高而不危所以長守貴滿而不溢所以長守富富貴不離其身然後能保其社稷而和其民人蓋諸侯之孝離去聲守貴守富之孝下文各有也字

在上在一國臣民之上驕矜肆也高居尊位也危不安也制節制財用之節謹



守法度也滿處富足也溢瀆泛也位薄曰  
貴財足曰富社稷國之主也諸侯初受封  
則天子賜之土使歸其國而立社稷以社  
主土稷主穀民生所賴以安養者也諸侯  
在一國臣民之上而不敢自驕則身雖居  
高而不至於危殆不安矣制節財用謹守  
法度則財雖盛滿而不至於漏泛蕩溢矣  
居高位而不危則不失其位之貴是所以  
長守此貴也處盛滿而不溢則不失其財

之富是所以長守此富也富與貴常不離  
其身如此然後方能保有其社稷而和調  
其民人此蓋諸侯之孝當如是也蓋自其  
始封之君受命於天子而有民人有社稷  
以傳之子孫所謂國君積行累功以致爵  
位豈易而得之哉則爲諸侯之先公者其  
身雖沒其心猶願有賢子孫世世守之而  
不失也爲其子孫者果若循理奉法是以  
長守其富貴則能保先公之社稷和封公



孝經九章  
之民人矣諸侯之所以爲孝者莫大於此  
如其不念先公積累之艱勤恣爲驕奢至  
於危溢以失其富貴而不能保其社稷民  
人則不孝莫甚焉此諸侯所當戒也

非先王之法服不敢服非先王之法言不敢  
道非先王之德行不敢行是故非法不言非  
道不行口無擇言身無擇行言滿天下無口  
過行滿天下無怨惡三者備矣然後能守其  
宗廟蓋卿大夫之孝也

德行擇行行滿之  
行並去聲惡去聲

法服法度之服先王制禮異章服以別品  
秩卿有卿之服大夫有大夫之服法言法  
度之言德行心有實得而見之躬行者也  
無擇謂言行皆遵法合度而無可選擇也  
爲卿大夫者當遵守禮法謹修德行非先  
王之法服不敢服惟恐服之不中身之失  
也非先王之法言不敢道惟恐言輕而招  
辜也非先王之德行不敢行惟恐行輕而  
招辱也以此之故非法則不言言則必合



法非道則不行行則必中道出於口者既無可擇之言行於身者亦無可擇之禮是以言之多至於徧滿天下而無口過行之多至於徧滿天下而無怨惡服法服道法言行德行三者既全備矣然後上無得罪於君下無得罪於民斯能長守其宗廟以奉其先祖之祭祀矣此蓋卿大夫之孝道也古者宗廟之制天子七廟諸侯五廟大夫三廟卿與大夫同若服非法之服是僭

也道非法之言是妄也行非德之行是偽也三者有其一則不免於罪而宗廟有所不能守矣故以是言之卿大夫通王朝侯國之卿大夫而言卿之上有公即諸侯也資於事父以事母而愛同資於事父以事君而敬同故母取其愛而君取其敬兼之者父也故以孝事君則忠以敬事長則順忠順不失以事其上然後能保其爵祿而守其祭祀蓋士之孝也

長上聲



資取也取事父之道以事母其愛母  
於愛父雖未嘗不敬也而以愛為主  
主義母主恩故也取事父之道以事君其  
敬君則同於敬父雖未嘗不愛也而以敬  
為主以君臣之際義勝恩故也以此之故  
事母取其愛事君取其敬合愛與敬而兼  
之者惟父然也故由是移事父之孝以事  
君則爲忠矣移事父之敬以事長則爲順  
矣盡其忠順而不失其道以此事其上然

後能常安其祿位永守其祭祀矣此蓋士  
之孝當如是也君言社稷卿大夫言宗廟  
士言祭祀各以其所事爲重也庶人薦而  
不祭又非士之比矣此章蓋言人必有本  
父者生之本也愛與敬父兼之所以致隆  
於父一本故也致一而後能誠知本而後  
能孝故移孝以事君則爲忠移敬以事長  
則爲順能保爵祿而守祭祀豈不宦哉士  
事也自一命以上皆有所事故名曰士



有上中下三初命爲下士等而上之爲士  
士上士

用天之道因地之利謹身節用以養父母此

庶人之孝也養去聲

天之道謂天道流行爲春夏秋冬四時之  
運也地之利謂土地生植農桑之利也謹  
身者謹修其身不妄爲也節用者省節財  
用不妄費也庶人未受命爲士旣不得以  
事君所事者惟父母而已故以養父母爲

孝然養父母在於足衣食足衣食在於務  
農桑務農桑又在於順時今別土宜天之  
道春生夏長秋歛冬閉我則以春耕以夏  
耘以秋收冬藏用天之道如此則順時今  
矣地之利高下燥濕各有宜植我則或禾  
黍或秔稻或菽麥桑麻因地之利如此則  
別土宜矣蓋順天道而不辨地利則物無  
以成辨地利而不順天道則物無以生以  
天道地利二者皆得而後生植成遂



足於衣食矣衣食既足又必謹其身而不  
敢放縱節其用而不敢奢侈惟恐縱則  
犯禮而自陷於刑戮侈用則傷財而不免  
於飢寒常以此爲心則所以養其父母者  
不徒養口體有餘而養志亦無不足矣此  
則庶人之孝所當然也庶人泛指衆人學  
爲士而未受命與農工商賈之屬皆是也  
故自天子已下至于庶人孝無終始而患  
及者未之有也

已下二字今文  
無于今文作於

唐玄宗云五孝之用則別而百行之源不  
殊自天子而下爲諸侯爲卿大夫爲士爲  
庶人凡五等也夫子既條陳五孝之用而  
具言孝道之極至則天子可以刑四海諸  
侯可以保社稷卿大夫可以守宗廟士可  
以守祭祀庶人可以養父母其必至之效  
有如此者聞者亦宜有以自勸矣然猶恐  
其信道之不篤用力之不果而又以所  
之行與不行爲無所損益於是又有以



戒之謂以此之故上自天子下至庶人各盡其孝而有終始則福必及之如前所云者苟或雖知為孝而無終始則禍必及之不得如前所云者蓋所謂孝者雖有五等之別實為百行之本其始於事親終於立身則天子至於庶人一而已矣故夫子為天子庶人通設此戒以結上文之旨云如

此而禍患不及者未之有言理之所必無也學者可不敬誦而謹行之哉

### 右經一章

按朱子曰此一節夫子曾子問答之言而曾氏門人之所記也疑所謂孝經者其本文止如此其下則或者雜引傳記以釋經文乃孝經之傳也竊嘗考之傳文固多傳會而經文亦不免有離折增加之失顧自漢以來諸儒傳誦莫覺其非至或以為孔子之所自議則又可笑之尤者蓋經之首統論孝之終始中乃敷陳天子諸侯卿大夫士庶人之孝而其末結之曰故自天子已下至於庶人孝無終始而患不及者未之有也其首尾相應次第相承文勢連屬脉絡通貫同是一時之言無可疑者而後人以爲六章今文作七章古文作七章又增子曰及引詩書之文以雜乎其間使其文

雜乎其間使其文



斷開隔而讀者不復得見中聖言  
體大義為害不細故今定此六  
章者合為一章而刪去子日者  
引書者一引詩者四凡六十一  
以復經文之舊其傳文  
之失又別論之如左云

子曰君子之教以孝也非家至而日見之也  
教以孝所以敬天下之為人父者教以悌所  
以敬天下之為人兄者教以臣所以敬天下  
之為人君者詩曰愷悌君子民之父母非至  
德其孰能順民如此其大者乎  
父者兄者君者下今文各有也

夫子言君子之教人以孝也非必家至而  
戶至耳提而面命之也亦在施得其要而  
已必教之以孝使凡為子者皆知盡事父  
之道即所以敬天下之為人父者也教之  
以悌使凡為人弟者皆知盡事兄之道即  
所以敬天下之為人兄者也教之以臣使  
凡為人臣者皆知盡事君之道即所以敬  
天下之為人君者也蓋致吾之敬者終有  
限惟能使人各自致其敬者斯無窮也



引澗酌之詩曰君子有如此愷悌之德民  
愛之如父母蓋能以至德爲教順天下之  
心故其效如此其大也

右傳之首章釋至德以順天下傳去聲

曰然所論至德語意亦疎如上一章之失云○上章今爲傳之二章

子曰教民親愛莫善於孝教民禮順莫善於  
悌移風易俗莫善於樂安上治民莫善於禮  
釋至德章既言教民以孝悌之事至此章  
又申言之而并及乎禮樂孝所以愛其親

也故欲教民以相親相愛則莫有善於孝  
者矣悌所以敬其長也故欲教民以有禮  
而順則莫有善於悌者矣得其和之謂樂  
樂有鼓舞動蕩之意故欲移改其風變易  
其俗則莫有善於樂者矣得其序之謂禮  
禮有上下尊卑之分故欲上安其君下治  
其民則莫有善於禮者矣此四者蓋舉其  
要而言然孝悌禮樂一本也此經本以孝  
爲要道而四者之中孝又爲要孝於親必



於長孝悌之人心必和順和則樂也順則禮也四者相因而舉有則俱有矣

禮者敬而已矣故敬其父則子悅敬其兄則弟悅敬其君則臣悅敬一人而千萬人悅所

敬者寡而悅者衆此之謂要道道下今文有也字

上文兼言孝悌禮樂四者至此又獨歸重

於禮至於言禮則又以敬為主蓋父母於子一體而分愛易能而敬難盡故經雖以

愛敬兼言而此獨言敬而以禮為重者蓋

其所以有序而和者未有不本於敬而

之也故又極推廣敬之功用蓋此心之敬隨寓而見以此之敬而敬人之父則凡為

之子者莫不悅矣以此之敬而敬人之兄則凡為之弟者莫不悅矣以此之敬而敬

人之君則凡為之臣者莫不悅矣彼為人子為人弟為人臣者本皆有敬父敬兄敬

君之心而吾先有以敬之則深得其歡心矣此之敬加於一人而彼則千萬人悅所



敬者寡而悅者衆所守者約而施者博此之謂要道也所以結一章之肯

右傳之二章釋要道

朱子曰但經所謂要道當身已而推

之與此亦不同也

曾子曰甚哉孝之大也子曰夫孝天之經地之義民之行天地之經而民是則之則天之明因地之義以順天下是以其教不肅而成其政不嚴而治

夫音扶行去聲之經之義之行下文各有也字因地之

義今文作之利

天以陽生物父道也地以順承天母道也天以生覆為常故曰經地以承順為宜故曰義人生天地之間稟天地之性如子之肖像父母也得天之性而為慈愛得地之性而為恭順慈愛恭順即所以為孝故孝者天之經地之義而人之行也孝本天地之常經而人於是取則為則者法也天地之經常久而不變人之取則於天地亦常久而不易其於衆入之中又有聖人者出



法天道之明因地道之義以此燭天下愛  
親敬長之心而治之是以其為教也不待  
戒肅而自成其為政也不假威嚴而自治  
無他孝者天性之自然人心所固有是以  
政教之速化如此

右傳之三章蓋釋以順天下

朱子曰但以至因地之義皆是春秋左氏傳所載子太叔為趙簡子道子產之言唯易禮字為孝字而又勞反不若彼之通貫條目及不若彼之完備明此彼彼非彼取此無疑也子產曰夫禮之經地之義民之行也夫禮

民實則之則天之明因地之性其  
便之之實然後簡子贊之曰甚哉禮  
之大也首尾通貫節目詳備與此不  
同其曰先王見教之可以化民又與  
上文不相屬故溫公改教為孝乃得  
繼通而下文所謂德義敬讓禮樂好  
惡者却不相應疑亦裂取他書之成  
文而強加裝綴以爲孔子曾子之問  
答但求其見其所出耳然其前段文雖  
非是而理猶可通存之無害至於後  
段則文既可疑而謂聖人見孝可以  
化民而後以身先之於理又已悖矣  
况先之以博愛亦非立愛惟親之序  
若之何而能使民不遺其親邪其所  
引詩亦不親切今定先王見教以下  
凡六十九字並刪去



子曰昔者明王之以孝治天下也不敢遺小國之臣而況於公侯伯子男乎故得萬國之歡心以事其先王

昔者謂先代明王明哲之君遺忽忘也小國之臣謂土地褊小不能五十里附於諸侯曰附庸是也夫子言昔者明哲之王以孝道而治理天下也推其愛敬之心至於附庸小國之臣尚不敢有所遺忘小國之臣且不敢遺而況於公侯伯子男大國之

臣乎以此之故所以得天下萬國之歡心天子建國公侯地方百里伯七十里子男五十里五十里以下皆小國也合大小之國極言其多故曰萬國以萬國之衆而皆得其歡悅之心則尊君親上洞然無間人心和而王業固社稷靈長而宗廟尊安以此事奉其先王則孝道至矣孝道之至如此而嗣世之君乃不皆然則以不明不誠故也明足以有見而知事理之必然誠足



以有行而不怠於微賤則萬國歸心先王  
世享矣夫子所以首稱明王而繼言其不  
敢蓋不敢之心則祇懼之誠也卽經言天  
子之孝不敢惡慢於人是也  
治國者不敢侮於鰥寡而况於士民乎故得  
百姓之勸心以事其先君  
此言諸侯之孝治諸侯治一國者也老而  
無妻曰鰥老而無夫曰寡此二者則所謂  
天下窮民與夫疲癯殘疾顛連無告皆在

矣侮慢忽也一命以上爲士民則農工商  
賈也諸侯有卿大夫只言士民亦舉小以  
見大耳百姓或謂百官族姓或謂民之族  
姓然以上文萬國例之當是官族大夫之  
家先君始受命爲國君者也自天子以孝  
治天下而諸侯亦以孝治其國推其愛敬  
之心以及於國人至於鰥寡之微亦不敢  
侮慢之而况於士民乎以此之故所以得  
百姓之歡心百姓之心無不懽悅則能和



其民人保其社稷矣以此而事奉其先君  
豈非孝道之大者乎此與經言諸侯之孝  
相發明不敢侮鰥寡即不驕不奢之極得  
百姓之歡心即長守富貴之本也  
治家者不敢失於臣妾而況於妻子乎故得  
人之歡心以事其親

此言卿大夫之孝治士庶人亦并舉矣古  
者卿置側室大夫有貳宗士有隸子弟庶  
人工商各有分親皆所謂臣妾也臣妾

而踈妻子貴而親人之情常廢於親貴而  
薄於踈賤而昔之爲卿大夫以孝治其家  
者推其愛敬之心下及於臣妾會不敢少  
有失於臣妾之心彼踈賤者尚如此而况  
於妻子之親貴乎則不失其心可知矣是  
以無貴無賤無親無踈皆得其人之懽心  
而有以事其父母矣

夫然故生則親安之祭則鬼享之是以天下  
和平灾害不生禍亂不作故明王之以孝治



天下如此詩曰有學德行四國順之夫音快  
此總結治天下國家三節夫然猶言惟其  
如此也故猶言是以如此也生謂父母存  
時祭謂沒後奉祀安者其心無憂享者其  
魂來格人死曰鬼氣屈而歸也天子諸侯  
卿大夫皆以孝治天下國家而得人之權  
心以事其親如此故其生而存則親安之  
沒而祭則鬼享之由其心意之所安所以  
魂氣之易感也是以普天之未既和且寧

和則無乖戾之氣故災害不生平則無悖  
逆之事故禍亂不作災害如水旱疾疫生  
於天者也禍亂如賊君弑父作於人者也  
孝者天之經地之義而人之行也人人盡  
孝則心和氣和而天地之和應矣夫子遂  
總結之曰故明王之以孝治天下如此蓋  
由天子身率於上諸侯以下化而行之所  
以至此皆明王之力也又引抑詩以明之  
義取天子有大德行則四方之國順而行



之以明明王以孝治天下故諸侯卿大夫皆以孝治其國家也

右傳之四章釋民用和睦上下無怨朱

曰其言雖善而亦非經文之正意蓋經以孝而和此以和而孝也引詩亦無甚失且其下文語已更端無所隔礙故今且得仍舊取后不言合刪改者似此

曾子曰敢問聖人之德其無以加於孝乎無

今文作何字

曾子既聞明王以孝治其極至之效如此

於是又推廣而言敢問天子聖人之所以為治者固皆本於孝矣不知聖人之所以為德者果無以加於孝乎抑亦有在於孝之上可以致理成化過於此者乎

子曰天地之性人為貴人之行莫大於孝行去

天以陽生萬物地以陰成萬物天地之生成萬物者雖以陰陽之氣然氣以成形而理亦賦焉故夫子言人所稟受於天地之



性則比萬物爲最貴以能與天地參爲  
才也以天地之性言之則人爲貴以人之  
行言之則孝爲大何也人稟天地之性不  
過仁義禮智信五者而已專言仁又爲人  
心之全德義禮智信皆包括於其中仁主  
於愛愛莫先於愛親故仁之發見如水之  
流行親親爲第一坎仁民爲第二坎愛物  
爲第三坎此人所行之行莫大於孝也人  
惟不知孝之大也是故失於自亦惟不知

人之貴也所以失於自賤自賤則雖有人  
之形無以遠於禽獸矣自小則雖有聖賢  
之資無以拔於凡庶矣此夫子答曾子之  
問必先之曰天地之性人爲貴人之行莫  
大於孝所以使人知所自貴而先務其大  
者董仲舒謂必知自貴於物而後可與爲  
善亦夫子之意也

孝莫大於嚴父嚴父莫大於配天則獨小其  
人也



此極言孝之大者嚴尊敬也配合也周  
文王之子武王之弟成王之叔父名且食  
采於周位居三公故稱周公人子之孝於  
親者無所不至而莫大於尊敬其父尊敬  
其父者亦無所不至而莫大於配享上天  
惟天為大尊無與對而能以已之父與之  
配享所以尊敬其父者至矣極矣不可以  
復加矣然仁人孝子愛親之心雖無窮而  
立經陳紀制禮之節則有限求其能盡孝

之大而嚴父以配天者則惟周公其人也  
中庸曰武王未受命周公成文武之德追  
王大王王季上祀先公以天子之禮制為  
嚴父配天之禮者周公也故夫子稱之

昔者周公郊祀后稷以配天宗祀文王於明  
堂以配上帝是以四海之內各以其職來助  
祭夫聖人之德又何以加於孝乎

字助

郊祀祭天也祭天於南郊故曰郊后稷



之臣名棄舜命爲稷使教民播種百穀封於郃爲諸侯君其國故稱曰后稷是爲周之始祖文王大王之孫王季之子武王之父名昌明堂王者出政布治之堂南面向明故曰明堂宗祀謂宗廟之祭也天以形體言上帝以主宰言夫子言昔者周公之制禮也郊祀祭天則以后稷配尊后稷猶天也宗祀祭帝則以文王配尊文王猶帝也周公之所以尊敬其祖父如此是以

德教刑于四海四海之內爲諸侯者各以其職分所當然皆來助祭敬供郊廟之事孝道之感人若是則夫聖人之德又有何者可以加於孝乎夫子答曾子之問意已盡矣下文復申言聖人教人以孝之故故親生之膝下以養父母曰嚴聖人因嚴以教敬因親以教愛聖人之教不肅而成其政不嚴而治其所因者本也養去聲親父母也膝下謂孩幼嬉戲於父母之膝



下也養奉養也嚴尊嚴也敬禮敬也親昵  
昵也愛慈愛也本謂天性也聖人教人以  
孝非強之使然乃順其自然蓋親生膝下  
其初固惟知有親昵而已未嘗知有所謂  
尊嚴之道然一體而分則自然有親愛不  
容已之情天之性也雖曰親昵而其尊卑  
已自有一定不可易之序存焉天之分也  
此蓋其本然之所固有而聖人立教亦非  
強其所無而爲之故曰因嚴而教敬因親

以教愛所以教之愛敬者不過啓其良心  
發其善性而非有所待乎外也故其教不  
待肅而自成其政不待嚴而自治人子之  
生也三年然後免於父母之懷長我育我  
顧我復我出入腹我骨肉之親無有密於  
此者生養之恩無有太於此者故曰欲報  
之德昊天罔極言父母恩德與天地並雖  
盡孝道欲以報之亦復無有窮極此皆人  
心固有之理是以孩提之童無不知愛其



親聖人復恐其狎恩恃愛而易失於不敬  
於是因嚴教敬使愛而不至於褻又因親  
教愛使敬而不至於踈此聖人所以有功  
於人心天理而扶植彝倫於不墜也

右傳之五章釋孝德之本

朱子曰但嚴

論武王周公之事而贊美其孝之詞  
非謂凡為孝者皆欲如也又况孝  
之所以為大者本自有親切處而非  
此之謂乎若必如此而後為孝則是  
彼為人臣子者皆有今將之心而及  
陷於大不孝矣作傳者但見其論孝  
之大即以附此而不知其非所以為  
天下之通訓讀者讀之不以其意

為可也其曰故親生之膝以下下意  
却親切但與上文不屬而與下章相  
近故今文連下二章為一章但下章  
之首語已更端意亦重復不讀通為  
一章此語當依古文且附  
上章或自別為一章可也

子曰父子之道天性君臣之義父母生之續  
莫大焉君親臨之厚莫重焉不愛其親而愛  
他人者謂之悖德不敬其親而敬他人者謂  
之悖禮

重焉下今文有故字  
天性下今文有也字

此章雖引以子曰字更端終是承上章之  
意父子之道天性謂親也君臣之義謂嚴



也易曰家人有嚴君為父母之謂也以父  
之親言故曰續莫大焉以君之尊言故曰  
厚莫重焉德主愛亦是就親字說禮主敬  
亦是就嚴字說此蓋就所因者本也說一  
本之意親親而仁民仁民而愛物如水之  
一源而千條萬派皆此源之流如木之一  
根而千枝萬葉皆此根之發孟子一本之  
說正謂是也若昧一本之說不愛其親而  
愛他人者則謂之悖德不敬其親而敬他

人者則謂之悖禮蓋由愛敬其親而推以  
愛敬他人則為順不愛敬其親而先以愛  
敬他人則為逆矣

右傳之六章釋教之所由生

其親以下別為一章而各冠以子曰  
今文則合之而又通上章為一章無  
此二子子曰字而於不愛其親上加故  
字今詳此章之首語實更端當以古  
文為正不愛其親語意正與此文相  
續當以今文為正至君臣之義之下  
則又當有脫簡焉今不能知其為何  
字也悖禮以上皆格言但以順則逆  
以下則又雜取左傳所載季文子此  
官文字之言與此上文既不相應而



彼此得失又如前章所論子之語  
今刪去凡九十字季文子曰以則  
昏民無則焉不以度於筮而皆在  
德是以去之北官文子曰君子在位  
可畏施舍可愛進退有度周旋可則  
容止可觀作事可法德行可象聲氣  
可樂動作有文言  
語有章以臨其下

子曰孝子之事親居則致其敬養則致其樂  
病則致其憂喪則致其哀祭則致其嚴五者  
備矣然後能事親養去聲 樂音洛  
此教之以善也居謂平居暇日無事之時  
致者推之而至其極也敬者常存恭敬不

敢慢易也養謂飲食奉養之時樂者歡樂  
悅親之志也病者謂父母有疾疾甚而病  
憂憂慮不遑寧處也喪謂不幸親死服其  
喪也哀哀戚追念痛切也祭謂親沒而祭  
祀之嚴謂精潔肅敬謹畏將事也人有一  
身心爲之主士有百行孝爲之大爲人子  
者誠以愛親爲心而不忘事親之孝平居  
無事常有以致其敬則敬存而心存於敬  
既立遇養則樂遇病則憂遇喪則哀遇祭



則嚴五者有一不備不可謂能然魯以敬  
為本

事親者居上不驕為下不亂在醜不爭居上  
而驕則亡為下而亂則刑在醜而爭則兵三  
者不除雖日用三牲之養猶為不孝也

養去聲

此戒之以不善也孝子之事親者居人上  
則當莊敬以臨下而不可驕矜為人下則  
當恭謹以事上而不可悖亂在己之醜類  
等夷則當和順以處衆而不可爭競苟居

上而驕則失道而取亡為下而亂則犯分  
而致刑在醜而爭則啟釁而召兵曰驕曰  
亂曰爭三者不除而曰亡曰刑曰兵三者  
必至危亡之禍憂將及親其為不孝大矣  
雖曰具牛羊豕三牲之養自以為盡禮親  
得安坐而食乎故曰猶為不孝也愚按此  
章以敬為主則有前之善無後之不善不  
敬者反是事親而欲盡孝者可不愛親而  
先盡敬乎



右傳之七章釋始於專親及不敬毀傷

朱子曰亦格言也

子曰五刑之屬三千而罪莫大於不孝

五刑墨劓剕宮大辟五等之刑墨者刺字而涅以墨劓截其鼻剕斬其趾宮男子割勢婦人幽閉辟法也大法死刑也占用肉刑漢文帝始除之斬左趾者答五百當劓者答三百率多死景帝又定律答五百曰三百答二百曰二百呂刑曰墨罰之屬千

劓罰之屬千剕罰之屬五百宮罰之屬三百大辟之罰其屬二百五刑之屬二千孔子蓋引此句以為刑罰之條目雖如此其多而罪之至大者無過於不孝則不孝者天地所不容也上章已足為天子諸侯卿大夫之戒矣於此又兼士庶人之戒焉要君者無上非聖人者無法非孝者無親此大亂之道也要平聲此極言不孝之罪所以為大君者臣之所



冥令者也而敢於要脅之是無其上也聖人者法之所從出也而敢於非議之是無其法也人莫不有父母也而敢以孝道為非是無其親也人必有親以生有君以安有法以治而後人道不滅國家不亂若三者皆無之此大亂之道也三者又以不孝為首蓋孝則必忠於君必畏聖人之法矣惟其不孝不顧父母之養是以無君臣無上下詆毀法令觸犯刑辟不孝之罪蓋不

容誅也

右傳之八章

朱子曰因上文不孝之云而繫於此亦格言也

子曰君子事上進思盡忠退思補過將順其美匡救其惡故上下能相親詩曰心乎愛矣遐不謂矣中心藏之何日忘之

上謂君也進謂進見於君退謂既見而退謂為臣者趨朝退朝時也內則父子外則君臣人之大倫也父子主恩君臣主敬故夫子言君子之事君上也進見於君已存



善道則思竭盡其忠極言無隱及其既退  
君有關失則思補塞其過進則復言其  
君有美意則將順其美助而成之惟恐不  
及君有惡念則匡救其惡諫而止之惟恐  
或形蓋忠臣之事君如孝子之事親先其  
意承其志迎其機而致其力一念之善則  
助成之無使優游不決沮遏而中止也一  
念之惡則諫止之無使昏蔽不明遂成而  
莫救也陳善閉邪慮之以早防之以豫戒

於未然止於無迹此魏鄭公所以願爲良  
臣而不願爲忠臣也爲臣豈不願忠蓋後  
世所謂忠必至犯顏敢諫盡命死節而後  
爲忠不知救其橫流而極其將亡未若防  
微杜漸爲忠之大也此龍逢比干之忠所  
以不如臯夔稷契之良而吾夫子亦以稱  
順其美匡救其惡爲盡忠補過之至也苟  
非君子進則面從退有後言有美不能爲  
而成也有惡不能救而止也激君以自高



詢君以自潔諫以為臣而不為君也是以  
上下相疾而國家敗矣今以君子而事  
所以忠愛其君者如此則君享其安佚臣  
預其尊榮故君臣上下能相親也君猶父  
臣猶子相親猶一家也君為元首臣為股  
肱相親猶一體也此相親之至也又引隰  
桑之詩以言臣心愛君雖在遐遠不謂為  
遠蓋愛君一念常藏心中無日暫忘也遠  
者猶不忘也而況於近可不盡忠愛乎

右傳之九章釋中於事君

朱子曰進思

過亦左傳所載士貞子語然於文理無害引詩亦足以發明移孝事君之意今並存之

子曰昔者明王事父孝故事天明事母孝故  
事地察長幼順故上下治天地明察神明彰  
矣故雖天子必有尊也必有先也  
言有兄也宗廟致敬不怠親也脩身慎行恐  
辱先也宗廟致敬鬼神著矣孝悌之至通於  
神明光于四海無所不通詩云自西自東自



南自北無思不服

長上聲 行去聲

易曰乾天也故稱乎父坤地也故稱乎母  
父有天道母有地道王者繼天作子效天  
母地凡其所以事天地之道亦不外事天  
母之道而已天人幽顯之道一也能事人  
則能事神矣事父孝故事天明能事父以  
孝則其事天也必明矣事母孝故事地察  
能事母以孝則其事地也必察矣此明察  
二字亦是就前章天經地義一句引來孔

子曰明於天之道而察於民之故孟子曰  
舜明於庶物察於人倫大抵經是總言其  
大者義是中間事物纖悉曲折之宜董子  
所謂常經通義亦是此意惟其為天之經  
也所以事父孝故事天明惟其為地之義  
也所以事母孝故事地察明字氣象本  
明睿智無所不照察則工夫細文理密察  
無所不周長幼順蓋就事父母推之也  
治蓋就事天地推之長幼尊卑無一不順



其序則人道盡矣極其序則三光全寒暑  
平而天道清矣山川鬼神亦莫不寧鳥獸  
魚鼈咸若而地道寧矣所謂神明者即造  
化之功用也事天地而至於如此豈不泮  
泮如其上如其左右乎此亦昔者明  
王之事如此後之爲天子者所宜取法也  
必有尊也言有父也因事父事母孝二句  
必有先也言有兄也因長幼順一句誰無  
父母皆可爲孝誰無兄長皆可爲悌又推

而上之不特事父兄爲然至於奉宗廟事  
先祖亦莫不然但須盡吾立身之道而已  
脩身慎行此是事親之始終不出於此故  
爲人子一舉足而不敢忘父母一出言而  
不敢忘父母惟恐一言一行之玷以辱其  
親若其事宗廟致敬其彰著尤可見其實  
皆自充吾一念之孝悌而至其極則其幽  
也可以通於神明其顯也可以光于四海  
其無所不通故引文王有聲之詩以贊之



嗚呼是道非仁孝誠敬之至豈足以與於此哉天人之道昭矣感應之理微矣讀是章者必有以深體而默識之

右傳之十章釋天未之孝

朱子曰有格言焉

子曰君子之事親孝故忠可移於君事兄悌故順可移於長居家理故治可移於官是以行成於內而名立於後世矣長上聲行去聲名非君子所尚也又曰君子疾沒世而名不稱焉聖人豈教人以好名哉名者實之

實有其實者必有其名苟沒世而名不見稱則是終其身無為善之實矣是以君子疾之苟疾其名之不稱當常恐其實之不至而孜孜勉焉可也夫子於此廣其義以終經言立身揚名之旨謂為君子者之於事親苟極其孝矣以孝事君則忠故忠可移於君事兄苟極其悌矣以敬事長則順故順可移於長居家苟極其理矣惟孝友于兄弟克施有政故治可移於官事君者



事親之推也事長者事兄之推也居官者  
居家之推也根固者葉必茂源深者流必  
長膏沃者光必燦是以孝悌之行成於內  
忠順之道達於外君子務實雖不求名而  
州閭鄉黨稱其孝兄弟親戚稱其慈僚友  
稱其悌執友稱其仁交遊稱其信不惟譽  
藹於一時而且名立於後世矣舜在側微  
又處頑父嚚母傲弟之間而能和以孝道  
是以帝堯聞之四嶽舉之天下君之萬世

師之豈有他哉孝悌而已矣所謂以顯父  
母者豈有過於此哉

右傳之十一章釋立身揚名及士之孝  
子曰閨門之內具禮矣乎嚴父嚴兄妻子臣  
妾猶百姓徒役也

此因上章言以治家之道而推之於一國  
此章又以治國之道而施之於一家蓋閨  
門之內恩常掩義至於治國之道則以義  
而斷恩傳者之意恐其閨門之內狎恩悖



愛易以流於親愛昵比之私故謂難處聞  
門之內一國之理實具焉嚴父有君之道  
嚴兄有長之道妻子臣妾即百姓徒役也  
以此施之則義有以制私尊卑內外整整  
然其有條理矣此實治國之要道也

右傳之十二章

朱子曰此因上三章三可  
移而言嚴父孝也嚴兄

弟也妻子臣妾宮  
也或云宜為十章

曾子曰若夫慈愛恭敬安親揚名參聞命矣  
敢問從父之令可謂孝乎  
去音扶今去聲參  
今文作則問於今

文有  
子字

夫子教曾子以孝曾子一歎孝之大次問  
無以加於孝夫子皆詳告之孝之始終備  
矣惟幾諫一節言之未及曾子於是包攝  
夫子之所已言者謂若夫慈愛恭敬安親  
揚名凡此之道則既得聞夫子之教命矣  
敢問為天子者一以順從為孝然則父母  
有命令將不問可否而悉從之然後可以  
為孝乎此曾子之善問也慈愛如養政其



樂恭敬如居致其敬安親不近兵刑揚名  
如立身行道揚名於後世之類

子曰是何言與是何言與昔者天子有爭臣  
七人雖無道不失其天下諸侯有爭臣五人  
雖無道不失其國大夫有爭臣三人雖無道  
不失其家士有爭友則身不離於令名父有  
爭子則身不陷於不義故當不義則子不可  
以不爭於父臣不可以不爭於君故當不義  
則爭之從父之令又焉得為孝乎

與平聲爭  
諍同

並去聲為  
於度反

見非而從成父不義有害於孝理所不可  
夫子故重言是何言與以戒之謂以從父  
之令為孝是何等言不可以訓也曾子本  
以從父之令為問夫子又推而廣之自天  
子至於庶人為臣子者見君父之過皆不  
可以苟順而不諫諍故昔者天子必有爭  
臣七人則雖無道亦可以不失其天下諸  
侯必有諍臣五人則雖無道亦可以不失



其國大夫必有諍臣三人則雖無道亦不以不失其家天子有天下四海之大萬幾之繁善則億兆蒙其福不善則宗社受其禍故必有諫諍之用以救其過而後可古者立誹謗之木設敢諫之鼓大開言路廣集忠益諍臣豈止七人而已哉夫子姑約而言之耳若次於天子爲諸侯又次於諸侯爲大夫國小於天下莫事必簡故五人而可家小於國其事又簡故三人而可其

實諫不厭多非必以數拘也下至於士則無臣未爲大夫則無家所有者身所賴者友故士以友諍則身不離其令名父以子諍則身不陷於不義人之太倫有五君臣父子爲之首而朋友居其末君臣朋友皆以人合惟父子爲天屬之親臣之忠愛其君者以道事君不可則止友之忠愛其友者忠告而善道之亦不可則止若子之於父無可止之義故曰君有過則諫三諫而



不聽則去親有過則諫三諫而不聽則號泣而隨之又曰事父母幾諫見志不從又敬不違勞而不怨起敬起孝悅則復諫積誠以感動之必其從而後已此則人子愛親之至終欲其歸於至善又有非臣與友之所得為者自士以下雖謂庶人然天子諸侯大夫士之子均為子也均愛之也父若有過子必幾諫無諉之諍臣諍友可也天子是以總言之曰故當不義則子不可

以弗爭於父臣不可以弗爭於君先父子而後君臣其旨深矣又曰故當不義則爭之從父之令又焉得為孝乎所以結一章之旨而終言是何言與之義也爭義當從諍諫之大者諫而不入則犯顏引義以爭之不聽則不止也

右傳之十三章 朱子曰不解經而別發一義

子曰孝子之喪親哭不偯禮無容言不文服美不安聞樂不樂食不甘此哀戚之情



豈及不  
樂音洛

君子有二樂父母俱存居其首則人間至  
樂無有大於此者矣一旦不幸而死乖吾  
之大樂豈不為大哀乎吾之一身父母生  
之本同體也存歿頓異骨肉睽離寧不為  
大痛乎夫子於是申言孝子之喪其親也  
哀痛之極發於聲為哭其哭也不俛氣竭  
而盡不能委曲也動於貌為禮其禮也無  
容觸地局脊不能為容也出於口為語其

言也不文內憂無情不能為文也服衣之  
美有所不安聞樂之和有所不樂食味之  
旨有所不甘無他人子之心念念痛親之  
死而已豈復計吾之生哉故寢苦枕塊服  
衰麻食溢米苟延殘喘於天地間已為過  
矣耳目之接口體之奉尚何心乎夫子故  
言此而結之曰此哀戚之情蓋謂此乃人  
心自有之情非聖人強之也  
三日而食教民無以死傷生毀不滅性此聖



人之政

今文有也字

禮三年之喪三日不食過三日則傷生矣所以三日而食者謂教天下之人無以哀死而至於傷生雖毀瘠而不滅其性性者人之所受於天以生者也性中有仁仁之發主於愛愛莫大於愛親父母存而愛敬之者根於性也父母歿而哀戚之者亦根於性也若以哀戚之過而傷生是性可滅也性可滅則生人之類滅矣此聖人之為

政所以為生民立命也

喪不過三年示民有終為之棺槨衣衾而舉之陳其簠簋而哀戚之擗踊哭泣哀而送之卜其宅兆而安措之為之宗廟以鬼享之春秋祭祀以時思之

簠方矩反簋居有反擗房盥反踊余龔反

此又自聖人之政而詳之人親之亡也孝子之心何有限量然而遂之是無節也故聖人為之立其中制不過三年所以示民有終極也其始死也為之棺以周於棺以



周棺衣衾以固身然後舉而斂之也陳其篋簋以素器而不見親之在則傷痛而哀戚之其祖餞也女擗男踊號哭涕泣而不忍親之去則悲哀而往送之爲墓於郊不可苟也則卜之塚穴曰宅墓域曰兆必得吉而安厝之此皆慎終之禮也爲廟於家必有制也則爲之三年喪畢遷主於廟始以鬼而禮享之及其久也寒暑變遷益用增感春秋祭祀以寓時思此追

遠之禮也至於忌日不用所謂君子有終身之喪念親之意果何有窮已哉此皆聖人之政因人之情爲之節文使過之者俯就不至者跂及也

生事愛敬死事哀戚生民之本盡矣死生之義備矣孝子之事親終矣此又合始終而言之以結一書之旨孝子之事親也事死如事生事亡如事存於其生也事之以愛敬於其死也事之以哀戚



生民之道孝悌爲本於此盡矣養也孝也  
其義爲大於此備矣至此則孝子之事親  
其道終矣。○人之情有所愛而所愛施於  
所親一錢之錐視爲已物必營護之。一飯  
之恩嘗爲已惠必思報之父今生我母今  
鞠我父母之德較之一飯之恩孰小孰大  
父母之身比之一錢之錐孰重孰輕尚能  
思報一飯之恩營護一錢之錐則所以思  
報父母營護父母者宜知所盡心而竭力

矣居則致其敬養則致其樂生事廢敬也  
喪則致其哀祭則致其嚴死事哀戚也夫  
民幼者非壯則不長老者非少則不養死  
者非生則不藏人情莫不愛其親愛之篤  
者莫若父子聖人因天之性順人之情而  
利導之教父以慈教子以孝使幼者得壯  
老者得養死者得藏是以民不夭折棄捐  
而咸遂其生日以蕃息而莫能傷故孝者  
生民之本也古者葬之中野厚衣之以薪



喪期無數後世聖人爲之中制中國欲其  
可繼也繼則欲其可久也措之天下而人  
其守之此法之所以不廢人之所以無憾  
也苴斬之服饘粥之食顏色之戚哭泣之  
哀皆出於人情不安於彼而安於此非聖  
人強之也三日而食三年而除上取象於  
天下取法於地不以死傷生毀不滅性因  
人情而爲之節也死者人之大變也舉而  
斂之哀戚而奠之擗踊哭泣而送之措之

以宅兆享之以宗廟時思之以祭祀精文  
盡於此矣所以常久而不廢也夫有生必  
有死有始必有終生事以禮死葬以禮祭  
之以禮則可謂孝矣故曰死生之義備矣  
孝子之事親終矣然夫子此書雖以授曾  
子而備言五孝之用則自天子諸侯卿大  
夫士庶人皆所通行而爲人上者又德教  
之所自出故一則曰先王有至德要道二  
則曰明王以孝治天下三則曰明王事父



孝事母孝至末意則亦曰教民無以死傷  
生又曰宗民有終也是則孝者天地之經  
人道之本誠有天下國家者之所先務也  
故雖生事葬祭貴賤有等禮不可違而獨  
三年之喪自天子達於庶人無貴賤一也  
聖人之爲生民慮者豈不深且遠哉宰予  
學於孔門親受夫子之教乃曰暮可已矣  
又何怪齊宣王之短喪漢文帝之以日易  
月自是而後習以爲常爲人上者如此何

以責其下哉尊信孟子惟一滕文公雖其  
父兄百官皆不欲曰吾先君莫之行吾宗  
國魯先君亦莫之行三年之喪能行者寡  
矣文公獨有感於孟子親喪固所自盡之  
一語排群議而力行之然後百官有司莫  
敢不哀百官族人可謂曰知至於四方之  
來吊者莫不大悅其有禮秉彝好德之良  
心蓋甚昭昭乎不可泯也然則感人心厚  
風俗至德要道何以加於孝哉



右傳之十四章

朱子刊誤，誤曰：熹舊見衡山胡侍郎論語說疑，孝經引詩，非經本文，初甚駭焉。徐而察之，始悟胡公之言為信。而孝經之可疑者，不但此也。因以書篋之沙，隨程可久文，程答書曰：頃見玉山汪端明亦以為此書多出後人傳會，於是乃知前輩讀書精審，固已及此。又竊自幸有所因述而免於鑿空妄言之罪也。因欲掇取他書之言，可發此經之旨，別為外傳。顧未敢專，淳熙丙午八月十二日記。

孝經大義終

右孝經一書，迺孔子曾子授受之要旨也。經秦火後，頗多錯簡。至宋大儒朱文公先生始取古文為之考訂，刊其謬誤。次其簡編，而後經傳各有統紀。董季亨氏又從而註釋之，而其旨益明。讀者誠能因其言而求諸心，因心之同然而推之家國天下，則天下之道盡在是矣。惜乎是書板行者少，而窮鄉下邑之士，不得盡觀也。予近按泉，偶於進士蔡介甫



家得是書舊本遂命工鈔梓以傳將使  
四方得以家傳人誦各與其親愛之心  
而篤夫仁孝之道庶或少補於風教之  
萬二三爾

成化二十二年歲次丙午秋九月甲子  
賜進士通奉大夫福建等處承宣布政使  
司右布政使淳安徐貫謹識

貞享元甲子夏五月吉辰

栗山字兵衛開



